

Cönta ën patouè Fîta cantonâa dû patouè 2 stàmbrè 2007 - Bâch' -Nînda

Coutéi avou'oun Chin

Chin Chebatchyan é cûgnû de tchuî é Nindey. No te fîtin o 20 janvyè. Di càquye j'an, chon é tsachyoëu que vînyon tsantâ a mècha, chërvî a choûpa po tchuî hlœu que chon inyû préé ouna vouarbèta. I dzînta tsapaèta che trûe cha rötâ que voua di Bâch' -Nînda œûtre ën Fey. Quechyon qu'i arey à pou préi sën cin j'an. Âtra di né, derën oun drôo de chöndzo, i tinû o coutéi avouë Chin Chebatchyan.

Mûri

Mà, gran Chin, dèquye te prin d'inî me tormintâ ën plin chöne, chi agnâ, i trayâ dû. Te chin tû mâ? A-tû caquye chinte mejére a me contâ?

Chin Chebatchyan

Murî, arey-tû oublâ que t'i de Bâch' -Nînda é qu'ën chi endrey, di que t'îre grë, t'i pâ yû choïn.

Mûri

Ouè, ouè, comprinjo præu, mà sta vya voua tan fö, sta vya é tan foûa que moujâ i chin ét atan râ qu'oun dzo de byô tin chi tsatin.

Chin Chebatchyan

É djûstamin por chin que vînyo te derindjyè. Couminso a troâ o tin on chû sta crêta, à boucâ a planna, à retinî é crepon du Ché Blan é du Ché Rödzo po que roubatèchon pâ bâ ën Âpro.

Murî

Oh! Chin Batchyan, che tû me permë de te dère Batchyan, é mé famiyè, é méi patouè avoué, o Chin Batchyan, po oun Chin qu'é-t-ën Vaii, t'i pâ a plîndre, à ömbra de ché byô noyè, avouë oun Blan é oun Rödzo, youn pe tsîquye man.

Chin Chebatchyan

Tu vey Murî, m'ënoûo coûme tû pâ pâ chaey. Câquye mèche pe r'an, câquye dzouënne que vouajon bâ rapachyè pé Ché, caquyè famële que vouajon fitâ chi pâ dèquye éna û couè da coumoûna. Chi inyû ounna chörta de plâche de pârquye. Demândo portan pâ tchyè, oun bondzô, câquye mô. Pâ youn que ch'aprösse po me féire oun chimblan de coutéi.

Mûri

Dèquye te mânque méi de to?

Chin Chebatchyan

To me mânque, i prossechyon di Rogachyon, éj'amouérœu da demîndze, é hlœu dû né, é crouè que vinyéon bretchyë é boquyë de Pâquye, hlœu que vouajan tapâ û balon éná û prê da cûra. Mânquon avouë hlœu dzouënne que che preparâon po inî chœudâ, IP coûme dejan. É vouïre de cou aré yo bayâ a benedichyon a hlœu chorchî qu'entrâon derèn a bouïre da vyële, chin chaey che pouran rechörtfî. Tû vé Murî a vyà que n'i öra. I chamînte mâ û cosson a förcha de veryë a tîta po véire pachâ voitûre, poûsta, camion, davoue rûe, tréi rûe ...é a pyâ, nyoun!

Murî

Coûme é Rogachyon pouran tan te manquâ. É darî di j'an, y aey djûsto câquye paroutsën po martchyâ darî Zavyë Dzîlo avou'o gonfanon.

Chin Chebatchyan

Îre portan byô töte hlœ itanîe ën atin. Me pléijo de vouârbe a tsantâ choë po m'ën chouinî:

Santa Maria, Ora pro no bis

Sante Gabriel Ora pro no bis

Ab omni malo Libera nos domine

Ab omni peccato Libera nos domine

Ut ubis indulges Te rogamus audi nos

Murî

Por te pout'être, t'a itâ chœudâ de Dioclétien, tu comprin tô, mà po noj'âtre doïn crouè, chimblâye méi û patouè qu'û atën. Yo avoué, m'enchouïgno ouncô öra de cacoûne:

Ëncourâ a muchyâ derèn o bi, T'a robâ o motchyoeu di nösse

Fâlîye pâ mouja a chërvinta, Can t'a 'piyâ bâ pé cösse

Chin Chebatchyan

I fouè é pâ méi coûme déan. Fo pâ voj'étonâ ch'i climâ che retzæûde, ch'i preycha é i frîta chon pâ méi tan böne. Ét a chin que chërvîyon é Rogachyon. Chin que me mancon avoué chon é j'amouérœu. Y aey de dävoue chörte. De dzouëne que vinyéon che catchyë û bon du dzo po frecantâ, yûin di parin. Rin de fran dondzerœu, deplâ pe èrba dæussa û bën o choutéi a che tôtchyë pèr chi, per lé. Djouà inossin. Podèquye vînyon pâ méi frotatchyë?

Murî

É tin an tsandjyâ, Chin Chebatchyan. Öra é dzouënne che béyjon déan to o moûndo, é y moûndo ch'acoutoûme.

Chin Chebatchyan

Ouà, mà éj'âtre, hlæu que chon prèsta a che maryâ é ouon chaey chi tsoûja mârtye bien. Coûme fajon?

Mûri

Véyo que déyo to t'aprîndre. Öra ouon pû éproâ a mécaniquye û pîlo, ën po yë, é ouon pû éproâ chin rësquâ d'aey ouon poupoun nû méy méi tâ. É fourney i tin avou'ouon dzouënne pouey dère: "Chi partey æutre ën Chin Chebatchyan avouo papa, é chi tornâ ën séi avoua mame."

Chin Chebatchyan

O Mûri, tû me fé chufri. Tan de tsandzemin. É de chæudâ, i a-t-i ouncô?

Murî

I a ouncô, che chin pû te conchoâ. Mà chon pâ méi é méimo, vouajon pâ coûme tû ch'acouèdre pe töte é batale po chërvî ëmperö. IP po che preparâ a inî chæudâ existe pâ méi. Öra ouon pû chamînte refujâ d'inî chæudâ, quechyon de conchyïnse.

Chin Chebatchyan

Che tû dî o veré, i moûndo de öra dey ître trîsto. Me conchæûerey avoua mèche dû 20 janvyë, hla né a mînte y a ouon pou de foué, ouon fon de veretâ

Murî

I fon de veretâ dûre ouna demy'æûre. Ét'i choëta vouârba de an âvou' é tsachyæu dëjon pâ de néyre. Chon ouon pou é Rogachyon de janvyë po qu'i aèche de tsamô, de sè, de marmöte û bën de îvre a son dû fûji d'æuton.

Chin Chebatchyan

Me continteréi de hla vouarbèta que me fé tan tsa û cou. Oun dzo de bonö é 364 d'atînte. Chin ét i vyâ d'ouon chin. Te âcho drûmi Murî, deman te fô trayë coûme éj'âtre. Che tû pâche pe Chin Chebatchyan, vën me bayë o bondzo.